



Udruženje/udruga "BH novinari", Kralja Tvrtka 5/5, 71000
Sarajevo Telefoni: 033 223 818, 033 217 302
E-mail: bhnovinari@bhnovinari.ba, WEB: www.bhnovinari.ba

URED VISOKOG PREDSTVANIKA U BOSNI I HERCEGOVINI – OHR
Ulica Emirika Bluma 1
71000 Sarajevo
n/r Gospodina Christiana Schmidta, visokog predstavnika

Sarajevo, 1.12.2025.

Poštovani,

Udruženje BH novinari obraća Vam se povodom dramatične i neodržive situacije u kojoj se nalazi Radio-televizija Bosne i Hercegovine (BHRT). Javni servis države BiH je u stanju potpunog finansijskog kolapsa, sa stvarnom prijetnjom obustave rada i gubitka posla za više od 700 zaposlenih.

Ovakvo stanje rezultat je dugotrajnih političkih blokada i neprovođenja postojećih zakonskih obaveza, uključujući i zakonitu distribuciju prihoda od RTV takse. Nedopustivo je da opstanak državnog javnog servisa zavisi od političkih kalkulacija i uskostranačkih interesa, dok građani ostaju bez osnovnog prava na pravovremeno, tačno i nepristrasno informisanje.

Podsjećamo, BHRT je institucija od državnog značaja čiji opstanak direktno utiče na političku stabilnost, zaštitu javnog interesa i funkcioniranje demokratskih procesa u zemlji. Institucionalna blokada BHRT-a predstavlja alarmantan pritisak na slobodu medija i prijeti urušavanju kompletnog sistema javnog informiranja u BiH.

U skladu sa Aneksom 10 Daytonskog mirovnog sporazuma i mandatom OHR-a da nadzire provedbu civilnih aspekata mirovnog sporazuma, te da osigura stabilnost, funkcionalnost i integritet državnih institucija, smatramo da je ovo hitan slučaj koji zahtijeva Vašu intervenciju.

Ljubazno, ali odlučno apelujemo da hitno reagirate i pozovete Predsjedništvo BiH, Parlamentarnu skupštinu BiH i Vijeće ministara BiH da osiguraju finansijsku stabilnost BHRT-a i omoguće njegovo nesmetano funkcioniranje, te da zauzmete jasan stav da je političko blokiranje finansiranja BHRT-a neprihvatljivo i protivno principima javnog emitiranja u demokratskim društvima.

Ukoliko domaće institucije nastave ignorirati svoje zakonske obaveze, apelujemo da iskoristite Vaše nadležnosti kako biste omogućili privremeni ili trajni mehanizam finansiranja BHRT-a i na taj način podržite uspostavljanje dugoročno održivog, depolitiziranog i stabilnog modela javnog emitiranja u skladu sa evropskim standardima i preporukama međunarodnih organizacija.

Osim na ovlastima iz Aneksa 10 Daytonskog mirovnog sporazuma, naš se zahtjev temelji i na Vašoj odluci iz jula 2025. godine o izmirenja duga od 120 miliona maraka prema privatnoj kompaniji Viaduct iz budžeta države Bosne i Hercegovine, iako javnost nikada nije transparentno upoznata o tome zašto je nastao toliki dug i ko je u Republici Srpskoj direktno odgovoran za to. Podsjećamo i na Vašu odluku iz 2024. godine, kojom ste zahtijevali da institucije državne i zakonodavne vlasti Bosne i Hercegovine preuzmu obaveze osnivača i “vlasnika” sedam institucija kulture, uključujući i odgovornost države za njihovo stabilno finansiranje i održivost.

Naš zahtjev za donošenje posebne odluka u vezi sa opstankom BHRT –a utemeljen je i na činjenici da je upravo Ured visokog predstavnika bio kreator prvog Zakona o javnom RTV sistemu Bosne i Hercegovine, kojim su, među ostalim, definirani i modeli naplate i raspodjele RTV takse između tri javne radio-televizije: BHRT, RTVFBiH i RTRS. Već godinama svjedočimo kako Vaš ured nijemo, bez ikakve relevantne i legitimne reakcije, bez institucionalnog interesa, promatra kršenje Zakona o javnom RTV sistemu, iako Vaš mandat uključuje ovlasti međunarodnog predstavnika, odnosno „umješača“ u situacijama kada se civilni aspekti mirovnog sporazuma ne provode na efikasan način.

Naglašavamo još jednom da je Vaša hitna intervencija neophodna kako bi se spriječilo gašenje BHRT-a, ali i degradacija tripartitnog sistema javnog informiranja kao ključnog izvora informacija za većinu bh.građana. Gašenje BHRT – a bilo bi nenadoknadivo urušavanje medijskih sloboda u cijeloj državi, zbog čega je odgovorno i transparentno djelovanje institucija i međunarodnih aktera poput OHR-a od vitalnog značaja.

Zahvaljujemo na razumijevanju i očekujemo Vaše brzo djelovanje.

S poštovanjem,

U ime Upravnog odbora Udruženja/udruge BH novinari:

 

Borka Rudić, generalna tajnica